

Nada no a cambia: mester paga pa parkeer entre 9 am y 3 pm

Aruparking preparando pa maneho nobo 2020



ORANJESTAD (AAN): Director di Arubus, Eddy Mohamed a laga sa cu na e momentonan aki ta trahando duro

pa asina na 2020 por tin un maneho nobo na Aruparking. El a splica cu ainda ta funcionando cu e maneho anterior y

ta nifica cu di 9 am pa 3 pm di dialuna pa diasabra mester paga pa parkeer pa loke ta e vaknan blanco. E vaknan geel



ta keda designa pa chofernan cu tin vergunning.

A subraya cu esnan cu parkeer di manera ilegal lo wordo getouw. Lo tin vigilancia y si un persona para su auto y e wordo getow, e auto lo wordo hiba Arubus unda mester paga pa sak'e. Segun Mohamed,

Aruparking tin un team di hende cu diferente experticio. Nan ta sinta hunto y ta bin cu plan. Siman pasa tabata tin un reunion basta importante, a bisa cu no a bay door door cu ora di wak e parti di ley, ley ta limita Aruparking pa haci cierto cosnan, pa loke ta trata e plan nobo. Sinembargo, Aruparking ta bezig cu e plan nobo aki pa por present'e na gobierno y na comunidad. A enfatiza cu fin di aña no ta un bon temporada pa bin cu un cambio pasobra esey lo por afecta comercio. Ora aña nobo inicia lo por bin cu algo nobo, pero previamente lo por cuminsa trece informacion di e cambionan, Eddy Mohamed a splica.

Aruparking no kier causa panico pasobra ta bay bin un maneho nobo. Pa cu esaki kier traha cu comercio pa ora cu esaki wordo introduci no trece efectonan secundario cun'e. A enfatiza cu ainda e maneho, e reglanan, no a cambia.

Mester paga pa parkeer ariba vak blanco. Si bo parkeer malo, ariba acera, unda no mag di parkeer, bo ta cometiendo un infraccion y e ora Aruparking mester actua.

Semanalmente ta haya e hendenan cu ta parkeer malo, cu mester wordo getow. Nan no ta comprende of cu ta keda reta e sistema y esey ta jammer pasobra tur parti di mundo mester paga pa parkeer, a indica. Na Aruba a purba di reglamenta esaki di e mihor manera posibel pa tur hende haya un lugar di parkeer sin ningun problema, a manifesta. Mirando e cambionan cu ta bay tin unda parkeer vaknan ta bay bira gratis y mas parkeer blanco ta bay bin y parkeer vaknan geel ta bay keda, asina cu tur cos ta aproba nan lo inicia.

Mohamed ta kere cu pa fin di aña caba ta bay ta informando comunidad con e maneho ta bay ta. Lo por bin un fase di prueba, pero e informacion mester ta hopi duidelijk na e usuarioonan con esaki ta hinca den otro pa nan cuminsa custombra.

A reitera cu lo bin cu un campaña informativo pa informa y educa e usuarioonan. E mashinanan ta na caminda, a agrega.